

性理大中

性理大中卷之二十八

錢塘應撝謙嗣寅父編集

河陽趙士麟玉峯父鑒定

通書

朱子曰。通書者。濂溪夫子之所作也。夫子姓周氏。名惇。願字茂叔。自少卽以學行有聞於世。而莫或知其師傳之所自。獨以河南兩程夫子嘗受學焉。而得孔孟不傳之正統。則其淵源。因可概見。然所以指夫仲尼顏子之樂。而發其吟風弄月之趣者。

亦不可得而悉聞矣。所著之書又多散失。獨此一篇。本號易通。與太極圖說。並出程氏。以傳於世。而其爲說。實相表裏。

太極圖說見前

誠上第一

誠者聖人之本。大哉乾元。萬物資始。誠之源也。乾道變化。各正性命。誠斯立焉。

此卽中庸所謂誠者物之終始。蓋萬物生於陽而成於陰。

純粹至善者也。

朱子曰。此是繳上二句。却與繼之者善不同。故曰。一陰一陽之謂道。繼之者善也。成之者性也。元亨誠之通。利貞誠之復。

通者性發而爲情。復者情斂而成性。

大哉易也。性命之源乎。

誠下第二

聖誠而已矣。誠五常之本。百行之源也。靜無而動有。至正而明達也。五常百行。非誠非也。邪暗塞也。故誠則無事矣。至易而行難。果而確。無難焉。故曰。一日克

已復禮天下歸仁焉。

誠幾德第三

誠無爲。幾善惡。德愛曰仁。宜曰義。理曰禮。通曰智。守曰信。

問以誠配太極。以善惡配陰陽。以五常配五行。此理固然。但陽變陰合。而生水火木金土。則五常必不可謂共出於善惡。此似只說得善之一脚。朱子曰。此書從頭是配合。但此處却不甚似。如所謂剛善剛惡。柔善柔惡。則確然是也。

配合指配太極圖說

稿謙按周子此等處。則太極陰陽五行皆以理言。不獨太極屬理。而陰陽五行屬氣也。

性焉安焉之謂聖。復焉執焉之謂賢。發微不可見。克周不可窮之謂神。

朱子曰。發之微妙而不可見。克之周徧而不可窮。

聖第四

寂然不動者誠也。感而遂通者神也。動而未形有無之間者幾也。誠精故明。神應故妙。幾微故幽。誠神幾曰聖人。

慎動第五

動而正曰道。用而和曰德。匪仁匪義匪禮匪智匪信。悉邪也。邪動辱也。甚焉害也。故君子慎動。

道第六

聖人之道。仁義中正而已矣。守之貴。行之利。廓之配。天地。豈不易簡。豈爲難知。不守不行不廓耳。

師第七

或問曰。曷爲天下善。曰師。曰何謂也。曰性者剛柔善惡中而已矣。不達曰剛。善爲義。爲直。爲斷。爲嚴。殺。爲

幹固。惡爲猛。爲隘。爲強梁。柔善爲慈。爲順。爲吳。惡爲懦弱。爲無斷。爲邪佞。惟中也者。和也。中節也。天下之達道也。聖人之事也。故聖人立教。俾人自易其惡。自至其中而止矣。故先覺覺後覺。闇者求於明。而師道立矣。師道立。則善人多。善人多。則朝廷正。而天下治矣。

剛柔之善。卽皆中也。剛柔之惡。皆過不及也。

幸第八

人之生。不幸不聞過。大不幸無耻。必有耻。則可教聞。

過則可賢。

思第九

洪範曰。思曰睿。睿作聖。無思本也。思通用也。幾動於彼。誠動於此。無思而無不通爲聖人。不思則不能通微。不睿則不能無不通。是則無不通。生於通微。通微生於思。故思者聖功之本。而吉凶之機也。易曰。君子見幾而作。不俟終日。又曰。知幾其神乎。

志學第十

聖希天。賢希聖。士希賢。伊尹顏淵大賢也。伊尹耻其

君不爲堯舜。一夫不得其所。若撻於市。顏淵不遷怒。不貳過。三月不遘仁。志伊尹之所志。學顏子之所學。過則聖。及則賢。不及則亦不失於令名。

順化第十一

天以陽生萬物。以陰成萬物。生仁也。成義也。故聖人在上。以仁育萬物。以義正萬民。天道行而萬物順。聖德修而萬民化。大順大化。不見其迹。莫知其然之謂神。故天下之衆。本在一人。道豈遠乎哉。術豈多乎哉。

治第十二

十室之邑。人人提耳而教。且不及。况天下之廣。兆民之衆哉。曰純其心而已矣。仁義禮智四者。動靜言貌。視聽無違之謂純。心純則賢才輔。賢才輔則天下治。純心要矣。用賢急焉。

禮樂第十三

禮理也。樂和也。陰陽理而後和。君君臣臣父父子子。兄弟弟夫夫婦婦。萬物各得其理。然後和。故禮先而樂後。

朱子曰。程子論敬則自然和樂。亦此理也。學者不

知持敬而務爲和樂。鮮不流於慢者。

務實第十四

實勝。善也。名勝。耻也。故君子進德修業。孳孳不息。務實勝也。德業有未至。則恐恐然畏人知。遠耻也。小人則僞而已。故君子日休。小人日憂。

愛敬第十五

有善不及。曰不及。則學焉。問曰有不善。曰不善。則告之不善。且勸曰。庶幾有改乎。斯爲君子。

設問人或有善而我不能及。則如之何。答言當學。

其善而已。問人有不善。則何以處之。答言人有不善。當告之以不善而勸之改。

朱子原註

有善一。不善二。則學其一而勸其二。有語曰。斯人有是之不善。非大惡也。則曰孰無過焉。知其不能改。改則爲君子矣。不改爲惡。惡者天惡之。彼豈無畏耶。烏知其不能改。故君子悉有衆善。無弗愛且敬焉。

動靜第十六

動而無靜。靜而無動。物也。動而無動。靜而無靜。神也。動而無動。靜而無靜。非不動不靜也。物則不通。神妙

萬物。水陰根陽。火陽根陰。五行陰陽。陰陽太極。四時運行。萬物終始。混兮闢兮。其無窮兮。

此章或以神爲理。大誤。此至道之原。當審思之。

樂上第十七

古者聖王制禮法。修教化。三綱正。九疇敘。百姓大和。萬物咸若。乃作樂以宣八風之氣。以平天下之情。故樂聲淡而不傷。和而不淫。入其耳。感其心。莫不淡且和焉。淡則欲心平。和則躁心釋。

朱子曰。古聖賢之語樂。曰和而已。此所謂淡。蓋以

今樂形之而後見其本於莊正齊肅之意故希簡而寂寥耳。

撫謙按古樂大音希聲亦淡之意。

優柔平中德之盛也。天下化中治之至也。是謂道配天地。古之極也。後世禮法不修。政刑苛紊。縱欲敗度。下民困苦。謂古樂不足聽也。代變新聲。妖淫愁怨。導欲增悲。不能自止。故有賊君棄父。輕生敗倫。不可禁者矣。嗚呼。樂者古以平心。今以助欲。古以宣化。今以長怨。不復古禮。不變今樂。而欲至治者遠矣。

樂中第十八

樂者本乎政也。政善民安。則天下之心和。故聖人作樂以宣暢其和心。達於天地。天地之氣感而大和焉。天地和則萬物順。故神祇格。鳥獸馴。

朱子曰。聖人之樂。既非無因而強作。而其制作之妙。又能真得聲氣之元。故其志氣天人交相感動。而其效至此。

樂下第十九

樂聲淡則聽心平。樂辭善則歌者慕。故風移而俗易。

矣。妖聲艷辭之化也亦然。

聖學第二十

聖可學乎。曰可。曰有要乎。曰有。請聞焉。曰一爲要。一者無欲也。無欲則靜。虛動直。靜虛則明。明則通。動直則公。公則溥。明通公溥。庶矣乎。

公明第二十一

公於已者。公於人。未有不公於已而能公於人也。明不至。則疑生。明無疑也。以能疑爲明。何啻千里。

理性命第二十二

厥彰厥微。匪靈弗瑩。剛善剛惡。柔亦如之。中焉止矣。
二氣五行。化生萬物。五殊二實。二本則一。是萬爲一。
一實萬分。萬一各正。小大有定。

顏子第二十三

顏子一簞食。一瓢飲。在陋巷。人不堪其憂。而不改其
樂。夫富貴。人所愛也。顏子不愛不求。而樂乎貧者。獨
何心哉。天地有至貴。至愛可求。而異乎彼者。見其大
而忘其小焉爾。

朱子曰。至愛之間。常有富可二字。

問孔顏所樂何事。朱子曰。不要去孔顏身上問。只去自家身上討。問鮮于侁。謂顏子所樂者道。伊川曰。若說有道可樂。便不是顏子。何也。朱子曰。程子之言。但謂聖賢之心。與道爲一。故無適而不樂。若以道爲一物而樂之。則心與道二。非所以爲顏子爾。問尋孔顏樂處。曰。先賢到樂處。已自成就。向上了。非幼學所能求。況今師非濂溪。友非二程。所以說此事。却是莽廣。不如且就聖賢着實用功處求之。如克己復禮。致謹於視聽言動之間。久之當自

純熟克達向上處。

見其大則心泰。心泰則無不足。無不足則富貴貧賤處之一也。處之一則能化而齊。故顏子亞聖。

師友上第二十四

天地間至尊者道。至貴者德而已矣。至難得者人。人而至難得者道德有於身而已矣。求人至難得者有於身。非師友則不可得也已。

師友下第二十五

道義者身有之則貴且尊。人生而蒙長無師友則愚。

性理大全卷之二十一
是道義由師友有之而得貴且尊其義不亦重乎其聚不亦樂乎

過第二十六

仲由喜聞過令名無窮焉今人有過不喜人規如諱疾而忌醫寧滅其身而無悟也噫

勢第二十七

天下勢而已矣勢輕重也極重不可反識其重而亟反之可也反之力也識不早力不易也力而不競天也不識不力人也天平人也何尤

文辭第二十八

文所以載道也。輪轅飾而人弗庸。徒飾也。况虛車乎。文辭藝也。道德實也。篤其實而藝者書之。美則愛。愛則傳焉。賢者得以學而至之。是爲教。故曰言之不文。行之不遠。然不賢者雖父兄臨之。師保勉之。不學也。強之不從也。不知務道德而第以文辭爲能者。藝焉而已。噫。弊也久矣。

聖蘊第二十九

不憤不啟。不悱不發。舉一隅不以三隅反。則不復也。

子曰。予欲無言。天何言哉。四時行焉。百物生焉。然則聖人之蘊。微顏子。殆不可見。發聖人之蘊。教萬世無窮者。顏子也。聖同天。不亦深乎。常人有一聞知。恐人不速知其有也。急人知而名也。薄亦甚矣。

周子蘊道甚深。當絕學之後。而不輕自見。故雖在位。而人鮮知者。然則非明道。周子之蘊。殆不可見。發周子之蘊。教後世無窮者。明道乎。

精蘊第三十

聖人之精。畫卦以示。聖人之蘊。因卦以發。卦不畫。聖

人之精。不可得而見。微卦。聖人之蘊。殆不可悉得而聞。易何止五經之源。其天地鬼神之奧乎。

精者精微之意。畫前之易。至約之理也。蘊謂凡卦中之所有。如吉凶消長之理。進退存亡之道。至廣之業也。

朱子原註

乾損益動第三十一

君子乾乾。不息於誠。然必懲忿窒慾。遷善改過。而後至乾之用。其善是損益之大。莫是過。聖人之旨深哉。吉凶悔吝。生乎動。噫。吉一而已。動而不慎乎。

朱子曰。中間乾之用。其善是其字。疑是莫字。

家人睽復无妄第三十二

治天下有本。身之謂也。治天下有則。家之謂也。本必
端。端本誠心而已矣。則必善。善則和親而已矣。家難
而天下易。家親而天下疎也。家人離。必起於婦人。故
睽次家人。以二女同居而志不同行也。堯所以釐降
二女於滹沱。舜可禪乎。吾茲試矣。是治天下觀於家。
治家觀身而已矣。身端心誠之謂也。誠心復其不善
之動而已矣。不善之動。妄也。妄復則无妄矣。无妄則

誠矣。故无妄次復。而曰先王以茂對時育萬物。深哉。
富貴第三十三
君子以道克爲貴。身安爲富。故常泰無不足。而銖視
軒冕。塵視金玉。其重無加焉爾。

陋第三十四

聖人之道。入乎耳。存乎心。蘊之爲德行。行之爲事業。
彼以文辭而已者。陋矣。

擬議第三十五

至誠則動。動則變。變則化。故曰擬之而後言。議之而

後動。擬議以成其變化。

朱子曰中庸易大傳所指不同。今合而言之。未詳其義。或曰至誠者實理之自然。擬議者所以誠之之事也。

刑第三十六

天以春生萬物。止之以秋。物之生也。既成矣。不止則過焉。故得秋以成。聖人之法天。以政養萬民。肅之以刑。民之盛也。欲動情勝。利害相攻。不止則賊滅無倫焉。故得刑以治。情僞微。暖其變千狀。苟非中正明達。

果斷者。不能治也。訟卦曰。利見大人。以剛得中也。噬
嗑曰。利用獄。以動而明也。嗚呼。天下之廣。主刑者民
之司命也。任用可不慎乎。

公第三十七

聖人之道。至公而已矣。或曰。何謂也。曰。天地至公而
已矣。

孔子上第三十八

春秋正王道。明大法也。孔子爲後世王者而修也。亂
臣賊子。誅死者於前。所以懼生者於後也。宜乎萬世

無窮。王祀夫子。報德報功之無盡焉。

孔子下第三十九

道德高厚。教化無窮。實與天地參而四時同。其惟孔子乎。

蒙艮第四十

童蒙求我。我正果行。如筮焉。筮叩神也。再三則瀆矣。瀆則不告也。山下出泉。靜而清也。汨則亂。亂不決也。言童蒙之人。來求於我。以發其蒙。而我以正道果決彼之所行。如筮者。叩神以決疑。初筮則告。二三

則惑。汨再三也。亂瀆也。汨則不靜。亂則不清。則告之不足以果其所行。而反滋其惑。不如不告之爲愈也。

朱子原註

慎哉其惟時中乎。艮其背。背不見也。靜則止。止非爲也。爲不止矣。其道也深乎。

艮其背者。止於不見之地也。止於不見之地則靜。靜則止而無爲。一有爲之之心。則非止之道矣。

朱子

原註

附周子拙賦

性理大全卷之二十一
巧者言。拙者默。巧者勞。拙者逸。巧者賊。拙者德。巧者
凶。拙者吉。嗚呼。天下拙。刑政微。上安下順。風清弊絕。
五峯胡氏曰。此書皆發端以示人者。度越諸子。直
與易書詩春秋語孟同流行於天下。

朱子曰。通書一部。皆是解太極說。○論所以入德
之方。經世之具。皆親切簡要。不爲空言。

摛謙按此書。先儒皆以爲與語孟並傳。余謂其結
體縝密。有本末。乃大學中庸之次。非如論語乃平
日隨記。

西銘

朱子曰。橫渠嘗於學堂。雙牖左書。砭愚。右書訂頑。伊川先生曰。是啟爭端。改曰東銘西銘。二銘雖同出於一時之作。然其詞義之所指。氣象之所及。淺深廣狹。判然不同。是以程門專以西銘開示學者。

乾稱父。坤稱母。予茲藐焉。乃混然中處。故天地之塞。吾其體。天地之帥。吾其性。民吾同胞。物吾與也。大君者。吾父母宗子。其大臣。宗子之家相也。尊高年。所以

長其長。慈孤弱。所以幼其幼。聖其合德。賢其秀也。凡天下疲癯殘疾。惲獨鰥寡。皆吾兄弟之顛連而無告者也。於時保之子之翼也。樂且不憂。純乎孝者也。違曰悖德。害仁曰賊。濟惡者不才。其踐形唯肖者也。知化則善述其事。窮神則善繼其志。不愧屋漏爲無忝。存心養性爲匪懈。惡言酒。崇伯子之顧養。育英才。穎封人之錫類。不弛勞而底豫。舜其功也。無所逃而待烹。申生其恭也。體其受而歸全者。參乎。勇於從而順令者。伯奇也。富貴福澤將厚吾之生也。貧賤憂戚庸

玉女於成也。存吾順事。沒吾寧也。

按吾儒之學。行遠自邇。升高自卑。而小儒遂僅以身家爲念。身家之外。視若吳越。留心民物。謂必當在服官之年。故橫渠發此論。而程門專以此示學者。龜山疑其言體而不及用。其流遂至於兼愛。以書質於伊川。程子曰。西銘之爲書。推理以存義。擴前聖所未發。與孟子性善養氣之論同功。豈墨氏之比哉。西銘明理一而分殊。墨氏則二本而無分。老幼及人理一也。愛無差等。本二也。分殊之

弊私勝而失仁。無分之罪。兼愛而無義。分立而推
理一。以正私勝之流。仁之方也。無別而遂兼愛。至
於無父之極。義之賊也。子比而同之。過矣。且謂言
體而不及用。彼欲使人推而行之。本爲用也。反謂
不及。不亦異乎。龜山復書曰。辱示西銘微旨。伏讀
竟日。曉然具悉。如侍几席。親訓誨也。時昔從明道。
卽授以西銘。使讀之。尋繹累日。乃若有得。於是始
知爲學之大方。固將終身佩服。豈敢妄議其失。比
同於墨氏。前書所謂西銘之書。以民爲同胞。長其

長幼其幼。以鰥寡孤獨爲兄弟之無告。蓋所謂明理一也。然其辭無親親之殺。非明者默識於意言之表。烏知所謂理一而分殊哉。故竊恐其流遂至兼愛。非謂西銘之書爲兼愛而發。與墨氏同也。古之人所以大過人者。無他。善推其所爲而已。老吾老以及人之老。幼吾幼以及人之幼。所謂推之也。孔子曰。老者安之。少者懷之。則無事於推矣。無事於推者。理一故也。理一而分殊。故聖人稱物平施。茲所以爲仁之至。義之盡也歟。何謂稱物。遠近親

疎各當其分。所謂稱也。何謂平施。所以施之。其心一焉。所謂平也。時昔者竊意西銘之書。有平施之心。無稱物之義。故謂過之者。疑其辭有未達耳。今得先生開論丁寧傳之學者。自當釋然無惑也。程子讀之曰。楊時也未釋然。其後龜山語錄有云。西銘理一而分殊。用未嘗離體。以人觀之。四肢百骸。至於一身者。體也。至其用處。則首不可以加履。足不可以納冠。蓋卽體而言。而用已在其中矣。朱子謂其年高德盛。而所見益精。然龜山所疑。以西銘

前段合之語。孟諸說殆所謂聖之任者。與聖之時則有間。龜山之語未可全駁。物吾與也。一語疑有弊。若曰與。則是朋友之交。未可殺而食之矣。體用之說。伊川駁之。無可疑者。

程子曰。西銘某得此意。只是須得子厚如此筆力。他人無緣做得。孟子以後。未有人及此。○訂頑一篇。意極完備。乃仁之體也。學者其體此意。令有諸已。其地位已高。到此地位。自別有見處。不可窮高極遠。恐於道無補也。

問西銘何如。曰：此橫渠文之粹者也。曰：克得盡時如何。曰：聖人也。橫渠能克盡否。曰：言有兩端。有有德之言。有造道之言。有德之言。說自己事。如聖人言聖人事也。造道之言。則知足以知此。如賢人說聖人事也。橫渠道儘高。言儘醇。自孟子後。儒者都無他見識。

朱子曰：推親親之厚。以大無我之公。因事親之誠。以明事天之道。

東銘

戲言出於思也。戲動出於謀也。發乎聲見乎四肢。謂非已心。不明也。欲人無已疑。不能也。過言非心也。過動非誠也。失於聲。謬逃其四體。謂已當然。自誣也。欲他人已從。誣人也。或者以出於心者。歸咎爲已戲。失於思者。自誣爲已誠。不知戒其出汝者。歸咎其不出汝者。長傲且遂非。不知孰甚焉。

正蒙粹語

正蒙者。橫渠張子之所作也。龜山楊氏謂關中學者尊信此書。與論語等。其徒未嘗輕以

示人。然程子曰。橫渠之言。誠有過者。乃在正蒙。又曰。子厚以清虛一大爲天道。是以器言。非形而上者。今觀其所言。如客感客形之類。似有深失。擇其言之粹者。著於篇。

太和所謂道。中涵浮沉升降動靜相感之性。是生絪縕相盪勝負屈伸之始。其來也幾微。易簡其究也廣大堅固。起知於易者乾乎。效法於簡者坤乎。散殊而可象爲氣。清通而不可象爲神。不如野馬絪縕。不足謂之太和。語道者知此。謂之知道。學易者見此。謂之

見易。

氣塊然太虛。升降飛揚。未嘗止息。易所謂絪縕。莊生所謂生物以息相吹。野馬者歟。此虛實動靜之機。陰陽剛柔之始。浮而上者。陽之清。降而下者。陰之濁。其感遇聚散。爲風雨。爲雪霜。萬品之流形。山川之融結。糟粕煨燼。無非教也。

撝謙曰。張子氣化之理。推之甚是。然須知有主之者。

鬼神者。二氣之良能也。聖者至誠得天之謂。神者太

虛妙應之目。

天道不窮。寒暑已。衆動不窮。屈伸已。鬼神之實。不越二端而已矣。

兩不立。則一不可見。一不可見。則兩之用息。兩體者。虛實也。動靜也。聚散也。清濁也。其究一而已。

感而後有通。不有兩。則無一。故聖人以剛柔立本。乾坤毀。則無以見易。

造化所成。無一物相肖者。以是知萬物雖多。其實一物。無無陰陽者。以是知天地變化。兩端而已。

一物兩體氣也。一故神。兩在故兩故化。推行此天之

所以參也。中兩語係張子所自註

凡圓轉之物。動必有機。既謂之機。則動非自外也。

日質本陰。月質本陽。

虧盈法。月於人爲近。日遠在外。故日受月光。常在於外。人視其終初。如鈞之曲。及其中天也。如半璧然。此虧盈之驗也。

陰陽之精。互藏其宅。則各得其所安。故日月之形。萬古不變。若陰陽之氣。則循環迭至。聚散相盪。升降相

求網緼相揉。蓋相兼相制。欲一之而不能。此其所以屈伸無方。運行不息。莫或使之。不曰性命之理。謂之何哉。

水火氣也。故炎上潤下。與陰陽升降。土不得而制焉。木金者土之華實也。其性有水火之雜。故木之爲物。水漬則生。火然而不離也。蓋得土之浮華於水火之交也。金之爲物。得火之精於土之燥。得水之精於土之濡。故水火相待而不相害。鑠之反流而不耗。蓋得土之精實於水火之際也。土者。物之所以成始而成。

終也。地之質也。化之終也。水火之所以升降。物兼體而不遺者也。

天道四時行。百物生。無非至教。聖人之動。無非至德。夫何言哉。

天不言而四時行。聖人神道設教而天下服。誠於此。動於彼。神之道與。

天不言而信。神不怒而威。誠故信。無私故威。

神天德。化天道。德其體。道其用。一於氣而已。

神爲不測。故緩辭不足以盡神。化爲難知。故急辭不

足以體化。

氣有陰陽。推行有漸爲化。合一不測爲神。其在人也。知義用利。則神化之事備矣。德盛者窮神。則知不足道。知化則義不足云。天之化也。運諸氣。人之化也。順夫時。非氣非時。則化之名何有。化之實何施。中庸曰。至誠爲能化。孟子曰。大而化之。皆以德合陰陽。與天地同。而無不通也。所謂氣也者。非待其蒸鬱凝聚。接於物而後知之。苟健順動止。浩然湛然之得言。皆可名之象爾。然則象若非氣。指何爲象。時若非氣。攝

何爲時。

無我而後大。大成性而後聖。

見幾則義明。動而不括則用利。屈伸順理則身安而德滋。窮神知化與天爲一。

神不可致思。存焉可也。化不可助長。順焉可也。存虛明久。至德順變化。達時中。仁之至。義之盡也。

無我。然後得正。已之盡。存神。然後妙應物之感。

義以反經爲本。經正則精。仁以敦化爲深。化行則顯。動物本諸天。以呼吸爲聚散之漸。植物本諸地。以陰

陽升降爲聚散之漸。物之初生。氣日至而滋息。物生既盈。氣日反而游散。至之謂神。以其伸也。反之爲鬼。以其歸也。

有息者根於天。不息者根於地。

獨見獨聞。雖小異。性也。出於疾與妄也。共見共聞。雖大異。誠也。出陰陽之正也。

賢才出。國將昌。子孫才。族將大。

寤形開而志交諸外也。夢形閉而氣專乎內也。寤所以知新於耳目。夢所以緣舊於習心。醫謂饑夢取飽。

夢與凡寤夢所感。專語氣於五藏之變。容有取焉爾。
不誠不莊。可謂之盡性窮理乎。性之德也。未嘗僞且
慢。故知不免於僞慢者。未嘗知其性也。
勉而後誠莊。非性也。不勉而誠莊。所謂不言而信。不
怒而威者與。

燭天理如向明。萬象無所隱。窮人欲如專顧影。區
區於一物之中爾。

知德以大中爲極。可謂知至矣。擇中庸而固執之。乃
至之之漸也。惟知學然後能勉。能勉然後日進。而不

息可期矣。

體正則不待矯而弘。未正必矯。矯而得中。然後可大。故致曲於誠者。必變而後化。

無所雜者。清之極。無所異者。和之極。勉而清。非聖人之清。勉而和。非聖人之和。所謂聖者。不勉不思而至焉者也。

不得已。當爲而爲之。雖殺人皆義也。有心爲之。雖善皆意也。正己而物正。大人也。正己而正物。猶未免有意之累也。

學者捨禮義則飽食終日無所猷爲。與下民一致。所
事不踰衣食之間。燕游之樂爾。

知至學之難易。知德也。知其美惡。知人也。知其人。且
知德。故能教人。使入德。仲尼所以問同而答異。以此
以責人之心責已。則盡道。所謂君子之道四。丘未能
一焉者也。以愛已之心愛人。則盡仁。所謂施諸已而
不願。亦勿施於人者也。以衆人望人。則易從。所謂以
人治人。改而止者也。此君子所以責已。責人。愛人之
三術也。

性理大全卷之二十一
二五十六
焉謙曰。張子三言雖善。在中庸之意。則唯一忠恕而已。

有受教之心。雖蠻貊可教。爲道旣異。雖黨類難相爲謀。

無不容。然後盡屈伸之道。至虛則無所不伸矣。君子無所爭。知幾於屈伸之感而已。

言有教。動有法。晝有爲。宵有得。息有養。瞬有存。易爲君子謀。不爲小人謀。

皇極經世書粹語

皇極經世書者。康節邵子之所作也。其獨得之理。窮極高深。而惜隱於數術之中。今表其粹者著於篇。

夫一動一靜者。天地至妙者歟。一動一靜之間者。天地人之至妙至妙者歟。是故知仲尼之所以能盡三才之道者。謂其行無轍迹也。故有言曰。予欲無言。又曰。天何言哉。四時行焉。百物生焉。其斯之謂歟。

夫天下將治。則人必尙行也。天下將亂。則人必尙言也。尙行則篤實之風行焉。尙言則詭譎之風行焉。天

下將治。則人必尙義也。天下將亂。則人必尙利也。尙義。則謙讓之風行焉。尙利。則攘奪之風行焉。

言之於口。不若行之於身。行之於身。不若盡之於心。言之於口。人得而聞之。行之於身。人得而見之。盡之於心。神得而知之。人之聰明。猶不可欺。况神之聰明乎。是知無愧於口。不若無愧於身。無愧於身。不若無愧於心。無口過易。無身過難。無心過易。無身過難。既無心過。何難之有。吁。安得無心過之人。而與之論心哉。是故知聖人所以能立於無過之地者。謂其善事。

乎心也。

三代之世治。未有不治人倫之爲道也。三代之世亂。未有不亂人倫之爲道也。後世之慕三代之治世者。未有不正人倫者也。後世之慕三代之亂世者。未有不亂人倫者也。

夫鑑之所以能爲明者。謂其能不隱萬物之形也。雖然。鑑之能不隱萬物之形。未若水之能一萬物之形也。雖然。水之能一萬物之形。又未若聖人能一萬物之情也。聖人所以能一萬物之情者。謂其聖人之能

反觀也。所以謂之反觀者。不以我觀物也。不以我觀物者。以物觀物之謂也。既能以物觀物。又安有我於其間哉。

乘數。生數也。除數。消數也。算法雖多。不出乎此矣。一分爲二。二分爲四。四分爲八。八分爲十六。十六分爲三十二。三十二分爲六十四。猶根之有榦。榦之有支。支之有葉。愈大則愈小。愈細則愈繁。合之斯爲一。衍之斯爲萬。

乾坤定上下之位。坎離列左右之門。天地之所開闢。

日月之所出入。是以春夏秋冬晦朔弦望晝夜長短。行度盈縮。莫不由於此矣。

無極之前。陰含陽也。有象之後。陽分陰也。陰爲陽之母。陽爲陰之父。故母孕長男而爲復。父生長女而爲姤。

性非體不成。體非性不生。陽以陰爲體。陰以陽爲體。動者性也。靜者體也。在天則陽動而陰靜。在地則陽靜而陰動。性得體而靜。體隨性而動。是以陽舒而陰疾也。

陽不能獨立。必得陰而後立。故陽以陰爲基。陰不能自見。必待陽而後見。故陰以陽爲唱。陽知其始而享其成。陰効其法而終其勞。

自下而上謂之升。自上而下謂之降。升者生也。降者消也。故陽生於下而陰生於上。是以萬物皆反生。陰生陽。陽生陰。陰復生陽。陽復生陰。是以循環而無窮也。

天地之本。其起於中乎。是以乾坤交變而不離乎中。人居天地之中心。居人之中。日中則盛。月中則盈。故

君子貴中也。

本一氣也。生則爲陽。消則爲陰。故二者一而已矣。六者三而已矣。入者四而已矣。是以言天而不言地。言君而不言臣。言父而不言子。言夫而不言婦也。然天得地而萬物生。君得臣而萬化行。父得子。夫得婦。而家道成。故有一則有二。有二則有四。有三則有六。有四則有八。

虎豹之毛。猶草也。鷹鷂之羽。猶木也。

飛者有翅。走者有趾。人之兩手。翅也。兩足。趾也。

飛者食木。走者食草。人皆兼之。而又食飛走也。

日行陽度則贏。行陰度則縮。賓主之道也。月去日則明生而遲。近日則鬼生而疾。君臣之義也。陽消則生陰。故日下而月西出也。陰盛則蔽陽。故日望而月東出也。

極南大暑。極北大寒。故南融而北結。萬物之死地也。夏則日隨斗而北。冬則日隨斗而南。故天地交而寒暑和。寒暑和而物乃生也。

天以剛爲德。故柔者不見。地以柔爲體。故剛者不生。

體字
疑非

金火相守則流。火木相得則然。從其類也。

象數筌蹄也。言意則魚兔也。得魚兔而謂必由筌蹄可也。舍筌蹄而求魚兔。則未見其得也。

天之神棲乎目。人之神發乎目。人之神寤則棲心。寐則棲腎。所以象天也。晝夜之道也。

圖雖無文。吾終日言而未嘗離乎是。蓋天地萬物之理盡在其中矣。

仁配天地。謂之人。唯仁者真可謂之人矣。

性理大全 卷之二十一 三
生而成。成而生。易之道也。

冬至之後爲呼。夏至之後爲吸。此天地一歲之呼吸也。

草伏之獸。毛如草之莖。林棲之鳥。羽如林之葉。

木結實而種之。又成是木而結是實。木非舊木也。此水之神不二也。此實生生之理也。

石之花。鹽硝之類是也。水之木。珊瑚之類是也。

水之物。無異於陸之物。各有寒熱之性。大較則陸爲陽中之陰。而水爲陰中之陽。

陽在陰中。陽逆行。陰在陽中。陰逆行。陽在陽中。陰在陰中。則皆順行。此真至之理。按圖可見之矣。

易有三百八十四爻。真天文也。

鷹鵬之類。食生而雞鳧之類。不專食生。虎豹之類。食生而猫犬之類。食生又食穀。以類推之。從可知矣。飛之類。喜風而敏於飛上走之類。喜土而利於走下。禽虫之卵。果穀之類也。穀之類多子。虫之類亦然。蠶之類。今歲蛾而子。來歲則子而蠶。燕青之類。今歲根而苗。來歲則苗而子。

在水者不瞑。在風者瞑。走之類上。曉接下。飛之類下。曉接上。類使之然也。

在水而鱗鬣。飛之類也。龜黿之類。走之類也。

飛之走。鷄鳧之類是也。走之飛。龍馬之屬是也。

神者人之主。將寐在脾。熟寐在腎。將寤在肝。正寤在心。

凡人之善惡。形於言。發於行。人始得而知之。但萌諸心。發於慮。鬼神已得而知之矣。此君子所以慎獨也。人之類。備乎萬物之性。

火無體。因物以爲體。金石之火。烈於草木之火者。因物而然也。

人之神。則天地之神。人之自欺。所以欺天地。可不慎哉。

人之畏鬼。亦猶鬼之畏人。人積善而陽多。鬼亦畏之矣。積惡而陰多。鬼弗畏之矣。大人者。與鬼合其吉凶。夫何畏之有。

至理之學。非至誠則不至。

物理之學。或有所不通。不可以強通。強通則有我。有

我則失理而入於術矣。

星之至微。如塵沙者。隕而爲堆阜。

心一而不分。則能應萬變。此君子所以虚心而不動也。

夫易根於乾坤而生於姤復。蓋剛交柔而爲復。柔交剛而爲姤。自茲而無窮矣。

夫聖人六經。渾然無跡。如天道焉。故春秋錄實事而善惡形乎其中矣。

韻法先閉後開者春也。純開者夏也。先開後閉者秋

也。冬則閉而無聲。

君子之學。以潤身爲本。

剗劇者才力也。明辨者智識也。寬弘者德器也。三者不可闕一。

兌說也。他說皆有所害。惟朋友講習。無說於此。

人患乎自滿。滿則止也。故禹不自滿假。所以爲賢。雖學亦當常若不足。不可臨深以爲高也。

人苟用心。必有所得。獨有多寡之異。智識之有淺深也。

性理二
卷之二
人必有德器。然後喜怒皆不妄。爲卿相。爲匹夫。以至
學問高天下。亦若無有也。

人必內重。內重則外輕。苟內輕。必外重。好利好名。無
所不至。

人之精神。貴藏而用之。苟銜於外。則鮮有不敗者。如
利刃。物來則剗之。若恃刃之利。而求割平物。則刃與
物俱傷矣。

言發於真誠。則心不勞而逸。人久而信之。作僞任數。
一時或可以欺人。持久必敗。

天地日月悠久而已。故人當存乎遠。不可見其近。室中造車。天下可行。軌轍合故也。苟順義理。合人情。日月所照。皆可行也。

中庸非天降地出。揆物之理。度人之情。行其所安。是爲得矣。

漢儒以反經合道爲權。得一端者也。權所以平物之輕重。聖人行權。酌其輕重而行之。合其宜而已。故執中無權者。猶爲偏也。王通言春秋王道之權。非王通莫能及此。

夫弓固有強弱。然一弓二人張之。則有力者以爲弓弱。無力者以爲弓強。故有力者不以己之力有餘。而以爲弓弱。無力者不以己之力不足。而以爲弓強。何不思之甚也。一弓非有強弱也。二人之力。強弱不同也。今有食一杯在前。二人大餒而見之。若相讓則均得食矣。相奪則爭。非徒爭之而已。或不得而食矣。此二者皆人之情也。知之者鮮。合此則天下之事。皆如是也。

先天學心法也。故圖皆從中起。萬化萬事生於心也。

撝謙按心居人之上中

事必量力。量力故能久。

孟子之言。未嘗及易。其間易道存焉。

學以人事爲大。

五霸者功之首。罪之魁也。春秋者孔子之刑書也。功過不相掩。

凡人爲學。失於自主張太過。

人知聖人之筆削。爲天下之至公。不知聖人之所以爲公也。如因牛傷。則知魯之僭郊。因初獻六羽。則知

舊僭入侑。因新作雉門。則知舊無雉門。皆非聖人有
意於其間。故曰春秋盡性之書也。舊無雉門。謂周公
之舊也。若當時則
有之則
久矣。

易之數。窮天地終始。或曰天地亦有終始乎。曰既有
消長。豈無終始。

一陰一陽。天地之道也。物由是而生。由是而成者也。
水在人之身爲血。土在人之身爲肉。

海潮者。地之喘息也。所以應月者。從其類也。

震爲龍。一陽動於二陰之下。震也。重淵之下有動。

者。豈非龍乎。

太極一也。

太極性也。

金須百煉然後精。人亦如此。

人得中和之氣。則剛柔均。陽多則偏剛。陰多則偏柔。人之爲道。當至於鬼神不能窺處。斯爲至矣。

摛謙曰。余謂人之爲德。至可與鬼神共見而咸服之。斯爲至矣。

天何依。曰依乎地。地何附。曰附乎天。曰然則天地何

依何附。曰自相依附。天依形。地附氣。

樵者謂漁者曰。吾嘗負薪矣。舉百斤而無傷吾之身。加十斤。則遂傷吾之身。敢問何故。漁者曰。樵則吾不知之矣。以吾之事觀之。則易地皆然。吾嘗釣而得大魚矣。與吾交戰。欲棄之。則不能捨。欲取之。則不能勝。終日而後獲。幾有沒溺之患矣。非直有身傷之患耶。魚與薪則異也。其貪而爲傷。則一也。百斤力分之內。者也。十斤力分之外者也。力分之外。雖一毫猶且爲害。而况十斤乎。吾之貪魚。亦何以異子之貪薪乎。

附邵子詩二首

一物其來有一身。一身還有一乾坤。能知萬物備於我。肯把三才別立根。天向一中分造化。人從心上起經綸。天人安有兩般義。道不虛行只在人。觀易

耳目聰明男子身。洪鈞賦予不爲貧。須探月窟方知物。未躡天根豈識人。乾遇巽時觀月窟。地逢雷處見天根。天根月窟閑來往。三十六宮都是春。觀物

或問邵子算天地始終十二萬九千六百年否。馮謙曰。此邵子以歲月日時推之。而謂天有元會運

世一元有十二會。會有三十運。運有十二世。世有三十年。年有十二月。月有三十日。日有十二時。其實天無許多年數。今只看黃帝始垂衣裳。堯時尙是洪荒。是天地始開不久。而邵子以堯時爲中天。豈得自此以前六萬餘年。茹血衣皮。未明人道。其謬可知。天地至成周始爲盛極。此是天地之中過。此乃衰。曰邵子之數。能言無不中。其言必不妄。曰今經世書可見。如祖三皇。父五帝。子三王。孫五霸。等語。豈是至數。大抵數之驗者。只能言其所知。不

能言其所不知。所以只是小術。至康節始通於道。然亦隨其所知而止。不然。則是康節賢於孔子也。

性理大中卷之二十八終